

Sanaartorneq pillugu Inatsisartut inatsisaata allanngortinneqarnera pillugu Inatsisartut inatsisaat kiisalu Grønlands tekniske Organisationi pillugu Inatsisartut peqqussutaata allanngortinneqarnerat (Sanaartukkani piusuni nukimmik sipaarniarluni aqqissuussinerit kiisalu nuna tamakkerlugu Illuutit Inissiallu nalunaarsuiffiannik BBR-imik pilersitsinissamut Naalakkersuisunut piginnaatitsisut)
(Ineqarnermut Attaveqaasersuutinullu Naalakkersuisoq)

Sanaartornermut Ataatsimiititaliap

Siunnersuutip aappassaaneerpeqarneranut

ISUMALIUTISSIISUTAA

Sanaartornermut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqtigiit, Siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Harald Bianco, Inuit Ataqtigiit
Inatsisartunut ilaasortaq Anders Olsen, Siumut
Inatsisartunut ilaasortaq Jens Kristian Therkelsen, Siumut

UKA 2022-imi ulloq 26. April UPA2023-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Inatsisissatut siunnersuuteqarnermini matumani Sanaartorneq pillugu Inatsisartut inatsisaat ulloq 1. juli 2010-mi atortussaatinneqalersoq inatsisartullu peqqussutaat, Grønlands Tekniske Organisation, allanngortinneqarnissaa Naalakkersuisunit kissaatigineqarpoq. Siunnersuut marlunnik siunertaqarpoq, ilaatigut sanaartukkanik nalinginnaasumik aserfallatsaaliineq ilutigalugu sanaartukkat nukimmik atuinerisa annikillisinneqarsinnaasunngortinneqarnissaat, ilaatigullu sanaartukkanik, inissianik, teknikkikkut atortuutinik il.il. nuna tamakkerlugu nalunaarsuisarnissaq aqqutissiuussinnaassallugu.

Illuutillit sanaartukkanik nalinginnaasumik aserfallatsaaliineq ilutigalugu sanaartukkat nukimmik atuinerisa annikillisinneqarsinnaasunngortinneqarnissaat, ilaatigullu

sanaartukkanik, inissianik, teknikkikkut atortuutunik il.il. nuna tamakkerlugu nalunaarsuisarnissaq aqputissiuussinnaanissaa siunnersuummi siunertarineqarpoq.

Sanaartukkani atortut atortorissaarutillu taarserneqarnissaanni atortunik atortorissaarutinillu nukimmik atuinermut pitsanngorsaataasunik piginnittut atuinissaannut piunasaqaasiortoqarsinnaanera, inatsisissamik siunnersuuteqarnermi siunnersuutigineqartumit qulakkeerniarneqarpoq. Taamaalilluni sanaartukkamik nalinginnaasumik aserfallatsaaliuineq ilutigalugu sanaartukkani piusuni nukimmik atuineq annikillisinneqassaaq.

Tunngaviusumik paasissutissaasivimmut piunasarineqartut naapertorlugit illuutit, inissiallu siunissami nalunaarsorneqartalersinnaaqullugit, inatsisitigut tunngavissaq inatsisissatut siunnersuutitigut aqputissiuorniarneqarpoq. Ataatsimut isigalugu tamatumani suleriaatsip atuuttup ingerlateqqinneqarnissaa siunertarineqartoq siunnersuuteqartup ilisimatitsissutigivaa. ”Inuiaqatigiit digitaliusut - Nuna tamakkerlugu digitaliseeriinermut periusissiaq 2018-2021” Namminersorlutik Oqartussat periusissiarisaanni tunngaviusumik paasissutissaasivik ilaavoq. Tunngaviusumik paasissutissat tamanit atorneqarsinnaasut atorluarneqarnissaat qulakkiissallugu siunertaqarluni pisortat ataatsimoorussamik attaveqaateqarnikkut aaqputissuussinera, paasissutissaasivik aqputigalugu ineriartortinneqassaaq.

Siunnersuutip Inatsisartunit siullermeerneqarnera

Siunnersuut taamatut iluseqartilugit partiinit tamanit taparserneqarpoq Sanaartornermullu Ataatsimiititaliamut suliarineqartussanngortinneqarpoq. Tassunga atatillugu inatsisissanik piareersarluni suliaqartoqarnerani tusarniaanermut akissutit tusaaneqarsimanissaat qulakkeerneqarsimassasoq kissaatigineqarpoq. Imm. 2 § 19 kalaallisut allanneqarnerani oqaaseq ”isernissaminut” atorneqarnerata itisilerneqarnissaa kissaatigineqarportaaq, taanna malillugu kommunalbestyrelsi sanaartukkap silataanik misissuinissaq uuttortaanissarlu siunertaralugit eqqartuussivimmi aalajangiinertaqanngitsumik isersinnaanissamik piunasaqarsinnaanngussaaq.

Tusarniaanermut akissutit

Siunnersuut piffissami 10. januarimiit 13. februarimut tusarniaassutigineqarpoq tusarniaanermilu kikkut tusarniaanermut akissuteqarsimanersut oqaaseqaatinit takuneqarsinnaavoq. Siunnersuummut oqaaseqaatini Naalakkersuisut tusarniaanermut akissutinut oqaaseqaateqarsimapput, taakkua takussutisiami eqikkarneri soorlutaaq oqaaseqaatigineqarsimasut ikkunneqarsimasut takuneqarsinnaapput. Siunnersuutip siullermeerlugu suliarineqarnerani tusarniaanermut akissutini oqaatigineqartut pillugit ataatsimiititaliap oqaaseqaatai immikkoortumi ataatsimiititaliap siunnersuummik suliarinninnerani pissapput.

Ataatsimiititaliap siunnersuummik suliarinninnera

Inatsisip allanngortinnera

Inatsisissatut siunnersuut marlunnik siunertaqarpoq:

- Allaffissornermi atortussanik pisortallu ingerlatsiviini atorneqarsinnaasunik sanaartukkanik, inissianik, teknikkikkut atortuutinik il.il. nuna tamakkerlugu nalunaarsuisarnissaq aqutissiuussinnaassallugu.
- sanaartukkanik nalinginnaasumik aserfallatsaaliuineq ilutigalugu sanaartukkat nukimmik atuinerisa annikillisinneqarsinnaasunngortinneqarnissaat, ilaatigullu

Allaffissornermi pisortallu ingerlatsiviini pilersaarusiormi sanaartukkanik, inissianik, teknikkikkut atortuutinik il.il. nalunaarsuisarnissaq:

Illuutit inissiallu ersarissumik normulersorlugit illuutinik inissianillu tamanik nalunaarsuisarneq annerusumik, minnerusumilluunniit inatsisitigut tunngaveqarluni ukiorpassuit ingerlanerini ingerlanneqartoq Naalackersuisunit ilisimatitsissutigineqarpoq. Tunngaviusumik paasissutissaasivimmuut piumasarineqartut naapertorlugit illuutit, inissiallu siunissami nalunaarsorneqartalersinnaaqullugit, inatsisitigut tunngavissaq inatsisissatut siunnersuutitigut taamaammatt aqutissiorneqarpoq. Ataatsimut isigalugu tamatumani suleriaatsip atuuttup ingerlateqqinneqarnissaa siunertaralugu, inatsisissatut siunnersuut ilusilersorneqartoq aammattaaq Naalackersuisunit ilisimatitsissutigineqarpoq.

Sanaartukkanik nalunaarsuisarneq pillugu kaajallaasitaq atuuttoq naapertorlugu kommuninit ullumikkut isumagineqarluni sanaartukkanik nalunaarsuisarneq, illulianillu normulersuisarneq ataqatigiissitsinneqarnissaat qulakkeerumallugu, tamanna sanaartornermut inatsimmut ilanngunneqassasoq siunnersuutigineqarpoq ("illunik nalunaarsuineq").

Kommunit nalunaarsuiffimmik ingerlatsissasut siunnersuutigineqarpoq. Taamaalilluni illuutit, sanaartukkat, teknikkikkullu atortuutit il.il. nalunaarsuiffimmuut nalunaarutigineqartarnissaat, paasissutissallu nutartertuarnissaat isumagissallugu kommuninit akisussaaffigineqassapput. Nalunaarsuiffiup imarisasaanik, paasissutissanik aallernissamut nalunaarsuiffinnullu allanut ataqatigiissitsinissaq kiisalu sanaartukkanut, inissianut, teknikkikkullu atortuutinut il.il. isersinnaanissaq kiisalu paasissutissanik takunnissinnaanermut atuisinnaanernullu kiisalu kommuninit nalunaarsuiffimmik ingerlatsinerinut nakkutilliinissaq pillugu Naalackersuisut malittarisassiuussinissaannut piginnaatinneqassapput. Inatsit naapertorlugu malittarisassat, inatsit malillugu suliarineqartut, kommuninik isumaqatiginninniareernikkut aalajangersarneqassapput.

Sanaartukkanik nalinginnaasumik aserfallatsaaliuineq ilutigalugu sanaartukkat nukimmik atuinerisa annikillisinneqarnissaat qulakkeerneqarnissaat pillugu

Naalackersuisut ilisimatitsissuteqarnerattut, sanaartornermut inatsit atuuttoq pineqartoq, aallaqqaatit, Inatsisip aalajangersagaanut naleqqiullugu sanaartorneq annertuppat, sanaartukkamilu allannguinermik kinguneqarpat sanaartornermut inatsit sanaartukkanut piusunut aallaavittut taamaallaat atuuppoq.

Sanaartornermut inatsit atuuttoq malillugu Sanaartukkanut nutaanut piunasaqaateqartarnerisulli sanaartukkani piusuni nukimmik atuinertup annikillisinneqarnissaanut assinganik piunasaqaateqanngilaq. Inatsimmi aamma nutaami sanaartukkanut piusunut tunngatillugu aamma iliuuseqartoqarnera aalajangiisusooq ataatsimiititaliamit Naalakkersuisut isumaqatigineqarput.

Allanngortiterineq imaluunniit allanngineq inatsimmi aalajangersakkanut annertunersoq apeqqutaatinngagu sanaartukkami aalajangersimasunik aserfallatsaaliuinermi kiisalu allanngortiterinermi allannguinermiluunniit sanaartornermut inatsit aamma atorneqarsinnaasunngorlugu, atorneqarsinnaanera siunnersuuteqarnermi matumani annertusineqarpoq.

Taamaalilluni sanaartukkami nukimmik atuinermut sunniuteqassallutik aserfallatsaaliuinerit, allanngortiterinerit allannguinerillu pineqarput. Sanaartugaq aserfallatsaaliorneqartillugu, sanaartornerillu imminermi allanngortiterinerunngikkaluarlutik imaluunniit sanaartukkamut allannguinngikkaluarlutik assersuutigalugulu sanaartukkami atortut atortulersuutillu sanaartukkami nukimmik atuinermut sunniuteqartut taarsersorneqarnerini, nukimmik atuinermut tunngatillugu sanaartorneq pillugu inatsisip qaqugukkulluunniit aalajangersagaasa malinneqarnissaasa qulakkeerneqarnissaa siunertaavoq.

Kalaallisut qallunaatullu allanneqarnerisa assigiinnginneri

Siunnersuutip siullermeerlugu suliarineqarnerani § 19-mi imm. 2-mi oqaaseq atorneqartoq ”isernissaminut” itisilerneqarnissaa kissaatigineqarpoq, taanna malillugu, kommunalbestyrelsi sanaartukkap silataanik misissuinissaq uuttortaanissarlu siunertaralugit kommunalbestyrelsi eqqartuussivimmi aalajangiinertaqanngitsumik isernissaminut piunasaqarsinnaavoq. Tamatumani, kalaallisuaa malillugu, sanaartukkap silataanik misissuinissaq uuttortaanissarlu siunertaralugit eqqartuussivimmi aalajangiinertaqanngitsumik isernissaminut piunasaqartoqarsinnaangussaaq. Oqaasertaliunneqarsimasut paatsiveerunnarsinnaaneri ataatsimiititaliamit isumaqatigineqarpoq.

Tamatuma avataatigut ataatsimiititaliaq siunnersuutip kalaallisoortani qallunaatoortaanilu iminnut naapertuutinngitsut allat pillugit oqaaseqammik tigusaqarpoq.

Inatsisip kalaallisuuini danskisuuinilu oqaatsitigut naapertuuttuunissaat pingaaruteqartoq ataatsimiititaliaq isumaqarpoq.

Ataatsimiititaliami sulilermi inatsisip kalaallisuuani oqaatsitigut iluarsiiisoqartariaqarnera ataatsimiititaliamit maluginiarneqarpoq, pingajussaaneerinninnissamullu kalaallisuuata iluarsineqarnissaanut allannguutissatut siunnersuummik Naalakkersuisut saqummiussaqaarnissaat naatsorsuutigalugu.

Siunnersuutip aningaasatigut kingunerisassai

Siunnersuutip piviusunngortinnerani aningaasatigut allaffissornikkullu kingunerisassai siunnersuummi nalinginnaasumik oqaaseqaatini allaaserineqarput. Naalakkersuisut

kingunerisassaannik taakkuninnga nassuiaanera Sanaartornermut Ataatsimiititaliamit tusaatissatut tiguneqarput tamatumunngalu ilassutitut oqaasissaqanngilaq.

Ataatsimiititaliap inassutai

Ataatsimiititaliap isumaqatigiittup siunnersuutip akuersissutigineqarnissaa inassutigaa.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.

Kristian Jeremiassen

Siulittaasoq

Siverth K Heilmann

Harald Bianco

Siulittaasup tullia

Anders Olsen

Jens Kristian Therkelsen